

Prome Minister Mike Eman

Ta creando incentivonan pa comercio sigui inverti den nan compania den caya grandi y rond Aruba

ORANJESTAD – Den e dialogo social gobierno a clausura cu un documento caminda ta bisa cu ta bay percura pa incentiva comercio sigui inverti den nan compania. Segun Prome Minister Eman den e decision cu a tuma den e dialogo social, a propone pa prolonga e deduccion di inversion for di belasting. Primeramente e intencion di gobierno

tabata pa termina e deduccion di inversion e aña aki. Gobierno a dicidi di prolonga esaki pa dos aña mas. Esaki ta un estimulo fiscal pa e inversionnan por keda reduci for di impuesto. Na mes momento e ta stimula pa inversionnan tuma luga den un pais por medio di comercio.

REDUCI INTERES

Na mes momento Eman ta bisa cu a papia cu banconan pa logra un reduccion di interes.

Poco poco gobierno a cuminsa mira cu e tendencia di banconan ta pa cuminsa reduci interes. Ideal pa gobierno tabata si e proceso por a bay mas lihe di loke e ta bayendo. A mira cu por lo menos 1 pa 1.5 porshento di reduccion a tuma luga riba interes pa

prestamo nan comercial y e punto aki ta algo cu a keda trata tambe den e dialogo social, caminda cu banco a muestra cu nan ta bay duna nan cooperacion y sosten den e proceso aki.

GARANTIA

Recientemente gobierno a termina e prome fase di un estudio cu nan ta bay ehecuta pa duna mas

sosten na comercio tambe. Segun Eman e intencion ta pa implementa un fondo di garantia pa comercio. Mesun cos cu tin un fondo di garantia pa vivienda kier bay crea un fondo di vivienda pa comercio tambe.

E intencion di e fondo di e garantia aki ta pa na momento cu un comerciante fia placa y nan equity y garantia no ta suficiente pa e banco tin confiansa, e fondo ta para garantia pa e diferencia. Esaki ta un forma pa e empresanan haya e fianza cu hopi biaha nan no ta logra di haya pa motibo cu nan no tin tur e garantianan ey.

STIMULA ECONOMIA

Gobierno ta considera e proceso nan aki como estimulo importante. Tanto e gremio comercial como esun sindical tin apoyo pa e pensamiento aki. E Prome mandatario a indica cu di un banda gobierno ta perde, pero dor cu ta stimula economia ta haya e entrada bek. Con exactamente e ta influencia e balansa ta dificil pa pronostica. Hopi biaha a keda demostra cu si e otro factornan di confiansa t'ey, E cantidad di inversion cu ta stimula cu esaki, loke bo ta perde na reduccion, bo ta gana esaki na estimulo di economia. Prome Minister Mike Eman tin confiansa cu esey ta bay bira e efecto di e proceso aki. □



Minister Mike Eman